

Program Transformasi Minda: Kembara Ilmu Agro@UPM perkasa staf dengan pengetahuan pertanian



Oleh: Noor Eszereen Juferi

Foto Oleh: Muhammad Nur Zairi Mohd Nazari

PUCHONG, 28 April – Universiti Putra Malaysia (UPM) melalui Pejabat Pendaftar menganjurkan Program Transformasi Minda (PTM): Kembara Ilmu Agro@UPM Siri 3/2025 bagi memperkasakan staf kumpulan pelaksana lantikan baharu dengan pengetahuan asas pertanian.

Urus Setia PTM (Kumpulan Pelaksana) Siri 3/2025, Nazreen Podzoldad, berkata program tersebut menjadi platform penting dalam membekalkan pemahaman holistik mengenai pertanian berteraskan inovasi, teknologi dan kelestarian.

“Program ini bukan sekadar memperkenalkan asas pertanian, malah memberi pengalaman pembelajaran secara praktikal supaya staf lebih dekat dengan identiti UPM sebagai universiti berteraskan pertanian,” katanya.



Pada siri kali ini, peserta telah didedahkan dengan teknik tanaman terrarium selain dibawa melawat ke sekitar Sultan Idris Shah Forestry Education Center (SISFEC), UPM, bagi memahami kepelbagaian ekosistem hutan serta peranan kelestarian dalam bidang pertanian.

Bagi Jururawat Unit Radiologi, Hospital Sultan Abdul Aziz Shah (HSAAS), UPM, Puteri Nur Syafiqah, penyertaan dalam program itu membuka ruang untuk memperoleh pengalaman baharu.

“Selama ini saya hanya terikat dengan tugas di hospital, namun melalui program ini saya dapat meneroka sisi lain UPM yang kaya dengan ilmu pertanian. Saya percaya ilmu ini boleh diaplikasikan dalam kehidupan seharian,” katanya.

Pembantu Tadbir (Perkeranian dan Operasi) HSAAS, UPM, berkata program itu penting dalam memahami UPM sebagai institusi yang berpaksikan pertanian.

“Walaupun bertugas dalam bidang berbeza saya mendapat pendedahan tentang pertanian itu sendiri. Ilmu seperti tanaman terrarium boleh dipraktikkan walaupun dalam skala kecil,” katanya.



Sebelum ini, PTM Kumpulan Pelaksana Siri 2/2025 telah diadakan di Pusat Pertanian Putra dan Fakulti Pertanian yang memberi pendedahan kepada 48 staf baharu mengenai asas bidang pertanian melalui pendekatan praktikal.

Dalam pada itu, penganjuran program ini membuktikan komitmen UPM dalam memastikan setiap warganya memahami akar tunjang universiti sebagai peneraju pendidikan tinggi dalam bidang pertanian di negara ini.